

DÍDZA'DO' ZÍ'ALÖ BUZÚAJĚ' PEDRO

Pedro rugapě' Dios nupa ta'dá' Cristo

1 ¹ Neda', Pedro, naca' gubáz nasól-lě'ě Jesucristo. Ruzúaja' queéli' lu guichi ni, libí'ili' násilasili' zi'tu' gapa dē lādza'li', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. ² Guró cazē' Xúziru' Dios libí'ili' ca na' bucözē' dza ni'te, para guéquili' quez queē' lu nē'ě Dios Bō' Lá'ayi, en gunli' ca rnna xtídzē'ě Cristo, en gácali' idú tsahui' ni'a que xichōnē' Cristo. Rinábida'-nē' Dios uzá' lādxē'ě queéli', en gunē' ga soa dxi icja lādxi'do'oli'.

Le rúntica'siru' löza

³ iYöl-la' ba Dios, Xuzē' Xanru' Jesucristo! iLu yöl-la' ruhuéchi' ladxi' zxön queē' bucubē' yöl-la' na'bán queēru' tu' busubanē' Jesucristo lu yöl-la' guti! iLē ni run ga rúntica'siru' löza, ⁴ en gun ga idéli'ru' lē na' rapa chi'ě Dios queēru' yehua' yubá! Lē na' rapa chi'ě Dios, le unödzjē' quégaca bōnachi queē', biti' initi, en biti' itēbi, en biti' igula. ⁵ Tu' réajlě'ēli' Lē', lu yöl-la' huáca zxön queē', Dios gun chi'ě libí'ili' cate' idxinrō dza ni' uzí'ili' xibé yöl-la' rusölá idú na' chinupé'ě queēru', en ulu'ě lahui dza údxi.

⁶ Que lē ni na' rudzėjade'eli', sal-la' na'a ral-la' quí'i sáca'li' tu chí'ido' tu' taca zían le ta'zí' bē' libí'ili'. ⁷ Tu' ruá' rilenli' yugu' lē na' ta'zí' bē' libí'ili', naca bē' naca idú ca réajlě'ēli' Cristo. Lē'sca' caní rizí' bē'ēru' oro, le initi, cate' ruchí'aru' le lu guí'. Que lē ni na', cate' chinazí' bē' yöl-la' réajlě' queéli' Cristo, le nácarō lesaca' ca oro, gaca queéli' yöl-la' zxön, en yöl-la' run bal dza ni' uluí'i lahuē' Jesucristo.

⁸ Libí'ili' nadxí'ili'-nē' Cristo sal-la' catu caz bilé'eli' Lē'. Réajlě'ēli' Lē' sal-la' biti' rilé'eli'-nē' na'a, ate' rudzėjali'. Yöl-la' rudzeja zxön queéli' le cabí gaca quíxjö'öru' tsca naca, naca idútē li. ⁹ Caní naca, tu' ridéli'li' yöl-la' rusölá que bō' naca cázali', le rata' queéli' tu' réajlě'ēli'-nē' Cristo.

¹⁰ Dza ni'te yugu' bōnni' gulu'ě didza' uláz queē' Dios bulu'sedē' dxí'ado' ca naca yöl-la' rusölá na' dē queēru' na'a, ate' gulu'ě didza' ca naca le ruzá' lādxē'ě Dios queēru'. ¹¹ Bō' Lá'ayi dzáguiē' Cristo buzéajni'inē' zí'atēlō bōnni' na' gulu'ě didza' uláz queē' Dios, en buluí'inē' légaquiē' ca ral-la' qui'i sáquē'ě Cristo, enca' ca gaca queē' yöl-la' zxön tōdi na'. Que lē ni na' guluí'i lādxi'gaquiē' ila'nózinē' bátaxi gaca lē ni, en nuzxi na' gaca que lē na' buluí'inē' Bō' dzáguiē' Cristo légaquiē'. ¹² Dios buluí'inē' bōnni' na' gulu'ě didza' uláz queē' biti' naca tu le ila'lé'enē' légaquiē', pero rē'u ni rilé'eru' lē na' gulu'ě didza' que, ate' libí'ili' riyónili' na'a ca naca que. Yugu' bōnni' tunē' libán que

didza' dxi'a tu'ë didza' que lë ni, ate' zóalen yöl-la' huáca queë' Dios Bö' Lá'ayi légaquië', Nu na' risól-lë'ë Dios zoë' yehua' yubá queëru', ate' té'ënnë' gubáz lá'ayi queë' Dios ila'nózinë' ca naca lë na' gulu'ë didza' que dza ni'te.

Dios rulidzë' rë'u para gácaru' lá'ayi

¹³ Que lë ni na', guli'sóa ban ladxi', en guli'cózatica'sö bá'ado'. Idú ládxi'li' buli'zxöni ládxi'li' lë na' uzá' ládxi'ë queëli' Dios dza ni' uluí'i lahuë' Jesucristo. ¹⁴ Guli'gún ca rnna xtídzë'ë Dios, en biti' güí'ili' lataj yugu' le rizé ládxi'li' ila'ché' libí'ili' ga yúbölö, ca na' benli' dza ni' biti' núnbë'ënili'-në' Dios. ¹⁵ Ral-la' gácali' lá'ayi ca naca yúgu'të le runli', ca na' náquië' lá'ayi Dios, en bulidzë' libí'ili' para guéquili' queë'. ¹⁶ Lësca' caní nazúaj lu guichi lá'ayi, ca na' gunné' Dios le rnna: "Guli'gaca lá'ayi, tu' naca' neda' lá'ayi."

¹⁷ Rëli'-në': "Xuztu'" cate' rulídzali'-në' Dios, ate' Lë', lébisö ca ruchia rusöröë' yúgu'të bönachi tsca naca le núngaca tu tu bönachi na'. Que lë ni na' ral-la' gádxili' Lë' tsanni ni zóali' yödzölió ni, le cabí naca idú ládxi'li'. ¹⁸ Dios busölé' libí'ili' lu lë na' gúcali' dza ni' cate' benli' ca nácagaca le cá'asö bulu'dödë' xuz xtó'oli' loli'. Nöz quézili' böá'uë' libí'ili', calëga len tu le initi ca naca oro, en plata, ¹⁹ pero len xichönë' Jesucristo le nácatërö lesaca', tu' budödi cuinë', en gúquië' ca tuba' bö'cu' zxila' nácaba' idú dxi'a, böa'do' tutië'-ba' lahuë' Dios para ugúa dul-la'. ²⁰ Dios guró cazë' Cristo zí'atëlö ca benë' yödzölió ni, ate' dza ni zóaru' na'a benë' ga buluí'i lahuë' para uzí'ili' xibé'. ²¹ Ni'a que le benë' Cristo réajlë'ëli'-në' Dios, busubanë' Lë' lu yöl-la' guti, en benë' ga náquië' lo. Caní naca, réajlë'ëli'-në' Dios, en ruzxöni ládxi'li' Lë'.

²² Na'a, chinún cuinli' dxi'a tu' runli' ca rnna le naca idútë li, en naca idú ca nadxi'ili' yugu' böchi' luzá'ali' ta'yéajlë'ë Cristo. Que lë ni na', idú ládxi'li' ral-la' idxí'ili' luzá'ali' tuli' ia'tuli'. ²³ Chiböáljali' leyúbölö, calëga tu' nuzóagaca bönachi tati caz libí'ili', pero nuzóa Nu zoa caz libí'ili', en náljalenli' xtídzë'ë Dios, le naca ban, en le zóatica'sö. ²⁴ Caní naca, tu' nazúaj lu guichi lá'ayi le rnna:

Yúgu'të bönachi nácagaca ca naca guixi'.

Yöl-la' lachi quéguequi naca ca xiyija guixi' na'.

Ribidxi guixi' na', en riguinnaj xiyija,

²⁵ pero xtídzë'ë Dios zóatica'sö.

Didza' ni bidxín queëli' lu didza' dxi'a.

2 ¹ Que lë ni na', guli'cá'ana yúgu'të le ruá' dö'. Bíti'rö si' yé'ëli', en biti' ubéaj dxi'a cuinli' lógaca bönachi. Bíti'rö uzxé'eli', en biti' innëli' que luzá'ali'. ² Ral-la' së ládxi'li' le naca queë' Dios Bö' Lá'ayi para gálali' ca na' tunbi' bi'i hué'ënido', ta'zé ládxi'bi' nidxi'. Caní ral-la' gunli' ga idxinrö dza uláli', ³ channö réquibe'eli' náquië' Xanru' dxi'i ladxi'.

Cristo náquië' ca tu guiój naca ban

⁴ Guli'biga' ga zoë' Xanru'. Náquië' ca tu guiój naca ban. Náquië' ca tu guiój bulu'cá'ana bönachi cá'asö pero naca tu le guró cazë' Dios le nazáca'tërö. ⁵ Lësca' caní, libí'ili' nácali' ca yugu' guiój nabángaca. Guli'güí' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bö' Lá'ayi. Lu yudo' na' gácali' ca bixúz néquiguequinë' quez queë' Dios, ate' lu në'ë Jesucristo gaca udódili' yugu' le runnë' Dios Bö' Lá'ayi queéli' lahuë' Dios, lë na' raza ládxë'ë Dios. ⁶ Que lë ni na' nazúaj ca' lu guichi lá'ayi le rnna:

Rigu'a lu zö'ö yödzö Sión tu guiój lo squin zö'ö,
le guró caza' neda', en naca lesaca'.

Nu réajlë' Lë', biti' ichixi inigui.

⁷ Naca guiój ni queéli' libí'ili' na' réajlë'ëli' Cristo tu le nazáca'da', pero quégaca nupa biti' ta'yéajlë' Cristo, naca ca na' nazúaj lu guichi lá'ayi le rnna:

Guiój na' bulu'zóë' bönni' tu'cu'ë zö'ö tsölá'alö,
tu' guléquinë' naca cá'asö,
guiój ni chinaca guiój lo squin zö'ö.

⁸ Lësca' caní nazúaj lu guichi lá'ayi le rnna:

Guiój ni gun ga tsöjchégu'gaca bönachi,
en gun ga tsöjtsó'ögaca.

Le nácatë yöjchégu'gaquië' bönni' biti' ta'yéajlë'ë Cristo, tu' gula'chíxinë' cate' bulu'zóë' xtídzë'ë Dios tsölá'alö. Dios bucu'ë légaquië' para ilunë' caní.

Nupa néquiguequi quez queë' Dios

⁹ Libí'ili' nácali' bönachi guró cazë' Dios. Yúgu'tëli' nácali' bixúz queë' Bönni' Unná Bë' Lá'ayi. Nácali' ca tu yödzö nequi quez queë' Dios. Nácali' bönachi que cazë' Dios. Caní nácali' para gaca gunli' libán que le zxön benë' Dios, Bönni' na' bulidzë' libí'ili' para birúajli' ga naca chul-la que dul-la', en guyázali' lu bení' idú queë'.

¹⁰ Zí'atëlö biti' gúcali' bönachi queë' Dios,
pero na'a chinácali' bönachi queë'.
Zí'atëlö cuntu nu buéchi' ladxi' libí'ili',
pero na'a Dios caz ruhuéchi' ládxë'ë libí'ili'.

Zóaru' nabanru' para gunru' ca ré'ënë' Dios

¹¹ Böchi' luzá'ado', nácali' ca bönachi zi'tu', en ridásili' yödzölió ni. Que lë ni na', ráta'yua' loli', biti' güí'ili' lataj ila'nná be'e le rizësö ládxli' libí'ili', yugu' le ta'díl-lalen bö' naca cázali'. ¹² Guli'gún le naca dxi'a lógaca bönachi biti' núnbë'gaquië' Dios. Caní gaca, channö ulu'zegui libí'ili' didza', en ila'nná tútili' bönachi, gaca ila'lé'e bönachi

yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

¹³ Tu' néquili' queë' Xanru', guli'gún bal yúgu'të bönni' ta'nná bë'ë, bönni' na' nucuá'agaca bönachi légaquië', sal-la' náquië' bönni' rinná bé'enë' idútë yödzölió, tu' náquië' bönni' lo unná bë', ¹⁴ o channö náquië' bönni' rinná bé'enë' tu yödzö, nu na' nuzóë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a. ¹⁵ Caní ré'ënë' Dios gunli' para ila'bó' dxíë' yugu' bönni' biti' bi nózguequinë', en biti' núnbë'gaquië' Lë', cate' ila'lé'enë' le naca dxi'a na' runli'.

¹⁶ Guli'gaca ca yugu' bönni' nazángaqüië', pero biti' ugunli' dxin yöl-la' nazán queéli' para gunli' le ruá' dö'.

Guli'gaca ca yugu' bönni' nadó'ogaquië' queë' Dios.

¹⁷ Guli'gún bal yúgu'të bönachi.

Guli'dxí'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' idútë yödzölió.

Le gudí'i guzxáquë'ë Cristo ruzéajni'i rë'u ca ral-la' gunru'

¹⁸ Núlöli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasö gunli' bal yugu' bönni' xanli' na' nácagaquië' tsahui', en tuí'i ládxi'gaquië' libí'ili', pero guli'gún bal ca' yugu' bönni' xanli' na' tu'saca' zi'ë libí'ili' lu dxin runli' quégaquië'.

¹⁹ Channö quí'i sáca'li', en biti' bi nabága'li', ate' guá' ilenli' lë na' tu' réquili' naca ca ré'ënë' Dios, urúajli' tsahui' lahuë' Dios. ²⁰ Na'a, channö ruá'ali' dö', ate' yugu' bönni' yúlahui' ilunë' libí'ili' xíguia', énacxi caz uzí'ili' xibé sal-la' len yöl-la' riböza zxön ladxi' queéli' guá' ilenli' lë na' gaca queéli'? Channö ribózáli' zxön ladxi', en ruá' rilenli' le riguí'i rizáca'li', ate' benli' le naca dxi'a, ní'irö urúajli' dxi'a lahuë' Dios. ²¹ Dios bulidzë' libí'ili' para quí'i sáca'li' caní, tu' gudí'i guzxáquë'ë Lë cazë' Cristo uláz queéli', en buzóë' queéli' tu le ruluí'i libí'ili' ca ral-la' gunli', para quí'i sáca'li' ca na' gudí'i guzxáquë'ë Lë'.

²² Cristo biti' bi dul-la' benë', en catu caz guzxí' yë'ë.

²³ Cate' bulu'dídza' yúdxinë' Lë',

biti' butsagui yúdxinë' légaquië'.

Cate' bulu'saca' zi'ë Lë',

biti' buzenë' légaquië' le bach,

pero budödi cuinë' lu në'ë Dios,

Nu na' ruchi'a rusöróë' le runru' ca sa'yéaj.

²⁴ Lë cazë' Cristo guzxi'ë dul-la' queëru' lu idú le naca cazë' cate' ni' gútië' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxi'a. Lë' gúquië' huë' uláz queëru' para huóácaru' rë'u dxi'a. ²⁵ Gúcali' ca yugu' bö'cu'

zxila' nanítigacaba', pero na'a budxinli' queë' Cristo, Nu ruyú libí'ili', en rapa chi'ë bö' naca cázali'. Náquië' queéli' ca tu' bönni' uyú bö'cu' zxila'.

Ca ral-la' ilún nupa nutsaga ná'gaca

3 ^{1,2} Lësca' caní, libí'ili' nigula, ral-la' gunli' bal bönni' que queéli', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lé'enë' le naca dxi'a runli', en ca na' nácali' ba'a ladxi', en runli' légaquië' bal, sal-la' biti' bi didza' ruí'ilenli' légaquië' ca naca queë' Cristo. ³ Yöl-la' lachi queéli' biti' naca le zoa láhuisö, tsca rupá'ali' ícjali', en tsca nácgaca le néquini oro nusí' cuinli', en lari' nazáca'da' náculi'. ⁴ Yöl-la' lachi queéli' ral-la' gaca le yu'u icja ládxi'do'oli'. Yöl-la' lachi le ridiá'tica'sö naca yöl-la' nöxaj ladxi', en yöl-la' ba'a ladxi', le nazáca'da'gaca lahuë' Dios. ⁵ Lësca' caní guca yöl-la' lachi quégacanu nigula gula'yéaj ládxi'nu Dios, nigula na' gula'cuá'anu dza ni'te. Bulu'zxöni ládxi'nu Dios, en gulunnu bal bönni' que queégacanu. ⁶ Caní bennu Sara, tu' bennu ca rnna xtídzë'ë Abraham, bönni' queénu, en bulídzanu lë', gunnānu: “Xan.” Libí'ili' ca' gunli' ca bennu Sara na' channö gunli' le naca dxi'a, en biti' bi gádxili'.

⁷ Lësca' caní, libí'ili', bönni', ral-la' güí'i ládxi'li' nigula que queéli'. Guli'gún légacanu bal, calégasö tu' nótá'gacanu ca yöl-la' nál-la queéli', pero lësca' tu' nadéli'gacanu yöl-la' na'bán na' runnë' Dios queéru', lébisö ca nadéli'li' libí'ili'. Guli'gún caní para cabí uzaga' tu' xihui' xinózáli' cate' ulídzali'-në' Dios.

Huaguí'i huazáca'ru' sal-la' gunru' le naca dxi'a

⁸ Ga ruúdxitë, guli'gaca tuz tuli' len ia'tuli' yúgu'tëli', en guli'güí' ládxi'li' luzá'ali' tuli' ia'tuli'. Guli'gaca dxi'i ladxi', en zxön ladxi'. ⁹ Biti' ubí'ili', cabí guá'ali' dö' que nu ruá' dö' queéli', en biti' utsaga yúdxili' nu rutsaga yudxi libí'ili', pero caní ubí'ili', inábili'-në' Dios gunë' ga gaca bica' ba nu na', tu' bulidzë' Dios libí'ili' para gácali' bica' ba.

¹⁰ Caní naca le nazúaj lu guichi lá'ayi le rnna:

Nu bönni' ré'ënë' uzi'ë xibé yöl-la' na'bán queë', en cözë' dxí'ado', ral-la' ucá'anë' didza' xihui', en cabirö si' yë'ë.

¹¹ Ral-la' ucá'anë' le ruá' dö', en gunë' le naca dxi'a.

Ral-la' güí'i ládxë'ë cözë' zxön ladxi', en gúntica'së' caní,

¹² Xanru' rapa chi'ë yugu' bönni' tsahui'

en ruzé náguië' le tu'lidzë' Lë',

pero ruzáguë'ë xinózguequi nupa tua' dö'.

¹³ ¿Nuzxi caz guá' dö' queéli' channö ruí'i ládxi'li' gúntica'sili' le naca tsahui'? ¹⁴ Sal-la' quí'i sáca'li' cate' runli' le naca tsahui', gácali' bica' ba. Cuntu nu gádxili', en biti' ubi uguí'ili' ¹⁵ pero buli'zxöni ládxi'li'-në' Cristo, en güí'ili' Lë' lataj inná bé'enë' lu icja ládxi'do'oli'. Guli'sóa sina'

quíxjöi'ili' yúgu'të nupa ila'nabi libí'ili' bizx que runli' löza Cristo, en gunli' læ ni lu yöl-la' nöxaj ladxi' queé'li', en lu yöl-la' run bal nupa na'.

¹⁶ Guli'gúntica'sö le naca dxi'a lahuë' Dios, en channö nacuá' nupa ta'nné xihui' que le naca tsahui' runli' tu' réajlë'ëli' Cristo, ní'irö ulu'tuí'i tu' nözi le ta'nné queé'li'. ¹⁷ Channö quí'i sáca'li', dxí'arö gaca channö naca tu' runli' le naca dxi'a, en calëga tu' ruá'ali' dö', channö Dios ré'ënë' quí'i sáca'li' caní.

¹⁸ Lë cazë' Cristo gudí'i guzxáquë'ë, en gútië' uláz queëru' para bugüë' dul-la' nabága'ru'. Lë' náquië' dxi'a, pero gútië' ni'a queëru', yugu' bönni' dul-la'. Caní benë' para bunë' rë'u tuz len Dios. Lu yöl-la' bönachi queë' gútië' pero lu bö' naca cazë' ni zoë' nabanë' lu le cubi le naca cazë'. ¹⁹ Lu bö' naca cazë' guyijë' yöjenë' libán lógaca bö' nadzúngaca. ²⁰ Bö' ni gulaca cazë' yugu' bönni', dza ni'te gula'dá'baguë'ë xtídzë'ë Dios, dza ni' zoë' Noé, cate' ni' gulözë' Dios lu yöl-la' riböza zxön ladxi' queë', en biti' busiúdxë' légaquië', tsanni ni' benë' Noé barco zxön na'. Lë'e barco na' bulu'lá nabábasö bönachi lu nisa. Gulaca xunu' bönachi, bönni', en nigula. ²¹ Nisa ni' naca tu le ruluí'i ca naca nisa ga na' ridílaru' nisa, le naca bë' nuláru' lu yöl-la' guti tu' bubanë' Jesucristo lu yöl-la' guti. Lë na' ridílaru' nisa biti' naca tu le run dxi'a le nácaru' láhuisö, pero ruluí'i ruí'i ládxi'ru' gaca dxi'a icja ládxi'do'oru' lahuë' Dios. ²² Jesucristo bubenë' yehua' yubá, ga na' yöjchö'ë cuita lë'ë ibëla Dios, en rinná bé'enë' yugu' gubáz lá'ayi, en nupa ni' ta'nná bë', en nupa nadéli'gaca yöl-la' zxön.

Ral-la' ugunru' dxin yöl-la' huáca queë'

Dios para gunru' xichinë' Cristo

4 ¹ Que læ ni na', ca na' gudí'i guzxáquë'ë Cristo lu le naca cazë', læsca' libí'ili' ral-la' soa cózali' quí'i sáca'li'. Nu na' riguí'i rizáca'a tu' da' le naca tsahui' chibucá'ana dul-la'. ² Na'a isí lo, ral-la' gúntica'sili' ca ré'ënë' Dios, en calëga ca rizësö ládxi'li' lu yöl-la' bönachi queé'li'. ³ Tsca'ti' gaz le chibenli' chibenli'. Bíti'rö gunli' ca na' tun nupa biti' núnbë'gaca Dios. Dza ni'te benli' yugu' le cabí ral-la' gunli'. Guzé ládxi'li' le ruá' dö'. Guzúdxili'. Gudödi bë' güí'i gudáguli', en guyéaj ládxi'li' budó' guiój budó' yaga, le rigútinë' Dios. ⁴ Na'a, tu'báninë' bönni' tunë' caní tu' cabirö runli' tsözxön légaquië' cate' tunë' le ruá' dö' caní, en que læ ni na' tu'tsaga yúdxinë' libí'ili'. ⁵ Légaquië' run bayudxi ulu'luí'i cuíngaquië' lahuë' Dios, ate' Lë' chizóa uchi'a usöröë' nupa nabángaca, en nupa chinátigaca. ⁶ Que læ ni na' guca libán que didza' dxi'a lógaca nupa chinátigaca, nupa na' Dios buchi'a busöröë' léguequi cate' ni' gula'cuá' yödzülió ni, ca na' ruchi'a rusöröë' yúgu'të bönachi. Guca libán lóguequi para ila'cuá' lu yöl-la' na'bán lu bö' nácagaca caz, ca na' zoa cazë' Dios lu yöl-la' na'bán.

⁷ Chizóa idxín dza údxí que yúgu'të le dë. Que lë ni na', guli'gaca ba'a ladxi', en buli'subán ládxi'li' para gaca ulídzali'-në' Dios. ⁸ Tu' runtë bayudxi, guli'dxí'i luzá'ali' tuli' ia'tuli', ate' channö dzágali' lu yöl-la' nadxí'i, gácali' sina' uniti loli' yugu' luzá'ali' tua' dö' queéli'. ⁹ Guli'güí' lataj ila'cuá' böchi' luzá'ali' lídxi'li', en biti' innëli' quégaquië'. ¹⁰ Ral-la' ugunli' dxí'ado' dxin yugu' le buzá' ládxi'ë Dios queéli', en gácalenli' luzá'ali' tuli' ia'tuli'. ¹¹ Nu bönni' runë' ba nalí, ral-la' gunë' ba nalí que xtídzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácatíca'sö queë' Dios yöl-la' ba, en yöl-la' unná bë'! ¡Ca' gaca!

Le ila'guí'i ila'zaca' bönachi ta'yéajlë' Cristo

¹² Böchi' luzá'ado', biti' ubánili' tu' nözi le ta'zí' bë'da' libí'ili'. Biti' naca tu le cabí núnbë'gaca bönachi. ¹³ Guli'dzëjade'e tu' dë lataj queéli' gunli'-në' tsözxón Cristo lu le riguí'i rizáque'ë Lë' ni'a que bönachi queë' para gaca udzëjali' ca' dza na' huödë' Cristo, cate' ilé'eli' yöl-la' zxön queë'. ¹⁴ Channö tu'dzaga yudxi bönachi libí'ili' tu' dá'ali' Cristo, bica' ba libí'ili', tu' naca bë' zóalenë' Dios Bö' Lá'ayi libí'ili', Nu na' za' yehua' yubá. Bönachi yödzülió ni tu'dzaga yudxi Lë', pero libí'ili' runli'-në' bal. ¹⁵ Channö riguí'i rizáque'ë nu bönni' dzáguië' libí'ili', ral-la' gaca caní tu' dë'ë Cristo, en calëga tu' rútië' bönachi, o ribanë', o ru'ë dö', o tu' yöjgútsë'ë ga yúbölö. ¹⁶ Na'a, channö nülöli' riguí'i rizáca'li' tu' dá'ali' Cristo, biti' ral-la' utuí'ili', pero guli'cu'ë Dios yöl-la' ba tu' nazí' lali' bönachi queë' Cristo.

¹⁷ Chibidxín dza isí lahuë' Dios uchi'a usöröë' bönachi rö queë'. Channö zí'alö uchi'a usöröë' rë'u, ¿nácxitëro gaca quégaca nupa biti' túngaca ca rnna didza' dxi'a queë' Dios? ¹⁸ Channö naca böniga ulu'lágaca nupa tun le naca dxi'a, ¿nácxitëro gaca quégaca nupa ta'dá'baga' Dios, en tun dul-la'? ¹⁹ Caní naca, yugu' bönni' ni ta'guí'i ta'zaquë'ë tu' ré'ënë' Dios gaca caní, ral-la' ilúntica'së' le naca tsahui', en ulu'dödë' bö' nácagaca cazë' lu në'ë Dios, tu' ben cazë' Lë' légaquië', en runë' ca rnna xtídzë'ë.

Pedro ruzéajni'inë' nupa ta'yéajlë' Cristo

5 ¹ Na'a, ruzéajni'ida' libí'ili', bönni' gula tapa chí'ili' nupa néquiguequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudí'i guzxáque'ë Cristo, ate' guna' ca' tsözxón libí'ili', uzí'iru' xibé yöl-la' zxön na' ilá' lahui. ² Guli'gaca ca bönni' tu'yüë' bö'cu' zxila', gun chí'ili' bönachi na' Dios gulu'ë lu ná'ali'. Guli'gún caní idú ládxi'li' ca ré'ënë' Dios, en calëga tu' run bayudxi queéli', o tu' rizé ládxi'li' dumí. Guli'gún xichinli' tu ré'ënisili', ³ en calëga tu' ré'ënili' inná bé'esili' nupa na' nagu'ë lu ná'ali'. Guli'güí'

ládxi'li' gácali' tu le ruluí'i ca ral-la' ilaca nupa na' run chí'ili'. ⁴ Caní naca, cate' uluí'i lahuë' Cristo, bönni' lo uyú bö'cu' zxila', idéli'li' tu le uzí'ili' xibé le catu caz initi.

⁵ Lësca' caní, bi'i cuidi', guli'gún ca ta'nné' yugu' bönni' gula. Yúgu'téli' ral-la' gunli' bal luzá'ali', tuli' ia'tuli', lu yöl-la' nöxaj ladxi' queéli', tu' nazúaj lu guichi lá'ayi le rnna:

Dios ruzáguë'ë xinózguequi nupa tun ba zxön cuínguequi
pero rácalenë' nupa nácatagaca nöxaj ladxi'.

⁶ Guli'sóa nöxaj ladxi' lu në'ë Dios, ate' Lë' uchisë' libí'ili' cate' izá'a dza. ⁷ Guli'cú'u yúgu'të le run ga ruúbi ruguí'ili' lu në'ë Dios, tu' ruí'i ládxë'ë libí'ili'.

⁸ Guli'gaca ba'a ladxi', en buli'subán ládxli'li', tu' zoa tu' xihui', nu bití' rilé'e libí'ili' dxi'a, ridá idú gásibi'ilö, en naca ca tuba' bëdxi guixi' ribódxí'aba', riguiljba' nu gáguba'. ⁹ Guli'gaca tsutsu ca réajlë'ëli' Cristo, en guli'zága' xinöza tu' xihui', tu' nózili' ta'guí'i ta'záquë'ë böchi' luzá'ali' idútë yödzölió ni ca na' riguí'i rizáca'li' libí'ili'. ¹⁰ Ní'irö cate' chigudí'i guzxáca'li' tu chí'isö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë cazë' Dios ruzá' ládxë'ë queéru' yúgu'të le ruzí'iru' xibé, en bulidzë' rë'u para uzí'iru' xibé yöl-la' zxön queë' le zóatica'sö tu' nácaru' tuz len Jesucristo. ¹¹ iGácatíca'sö yöl-la' ba, en yöl-la' unná bë' queë' Lë'! iCa' gaca!

Pedro ruzenë' didza' nupa ta'dá' Cristo

¹² Dídza'do' ni ruzúaja' queéli' lu guichi lu në'ë Silvano. Réquida' náquië' bóchi'ru' idú ladxi'. Ré'ënda' utipa' ládxli'li', en runa' ba nalí loli', le nácatë lë ni naca le ruzá' ládxë'ë queéru' Dios. iGuli'gaca tsutsu tu' ruzí'ili' xibé lë ni!

¹³ Yugu' bönachi queë' Cristo nacué' Babilonia tu'gapa Dios libí'ili'. Dios guró cazë' léguequi ca na' guröë' libí'ili'. Lësca' bi'i Marcos rugápabi' Dios libí'ili'. Nácabí' ca zxí'ini caza'. ¹⁴ Guli'gapa Dios luzá'ali' tuli' ia'tuli', en lu yöl-la' nadxí'i queéli' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxli'do'oli', yúgu'téli' na' néquili' queë' Jesucristo. iCa' gaca!